

حكاية « الاسكندر أبو الكرنين »

« جبار الجويراوي »

هناك ما هناك ، جان اكو ملك اسمه الاسكندر . وچان بقدره الله
براسس ذلك الملك الكرون اتنين وچان كلما ايزينه مزين
ويخلص منه ، يامر الجلاذ ماله باخذ راسه - حتى لا يسولف للناس -
وظل الاسكندر على هاي الحالة مدة ثلاثين عام ، كل مزين ايزينه ياخذ
راسه ، لن ظل بالولاية فرد مزين واحد .

وذلك اليوم وده الاسكندر واحد من جنوده على المزين وبرمشة عين
حضر المزين بين ايدين الملك خايف عرگه تاخذه وعرگه تجيبه . بس الملك امن
على كلبه وگاله : « يامزين انته لا تخاف وانه ما اخذ راسك اذا ضميت السر
بكلبك وماسولفته حتى على عايلتك » . المزين فرح اودار الدم ابوجهه
وانضى جدام الملك اوركض على رجلين الملك ابيوس هاي الجدم ويبوس
ذبح الجدم .

ظل المزين يتكلم بالولاية وهدومه ماماخذاته ، بس الناس اينشدونه
وين ما يروح « اشلون ما صلبك الملك ؟؟ » چان يسكت وينظهم اذن الطرشه
ويوم من الياام وساعه من الزمان شاف المزين بمد ما يكدر ايضم السر
بصدره خله الحراس ناموا اتلفف بهدمه وشرد خايف بالنهار ايضم روحه
وبالليل يمشي مناه لن وصل الفرد بير يابس - ما بيه ماي - اتمدد بيه وچان
يصرخ ابيطن البير « يا بير . . يا بير . . براس الاسكندر الكرون اتنين » .
« يا بير . . . يا بير . . براس الاسكندر الكرون اتنين » . ظل ايصح ويصح
حتى انطرت بطنه من الصايح او مات ابصف البير

ومرت الياام والسنتين وذلك اليوم مر ظفن من يم البير المات ابصفه
المزين اتنجبوا الناس البلظن لتهم شافوا امخضر ابيطن البير كصب فارسي
چتر حتى الزغار البلظن گاموا ييجون على ذلك الكصب المخضر ، ايريدون
ايسون منه مواصيل انكصر خاطر اهلهم عليهم او ودوا واحد من زلمهم
انلص اشجم كصبه للجهاال حتى ايسكتونهم . وصدك راح زله من بيناتهم
اوجاب باگه جبيرة من الكصب جسماهه على الزغار كل واحد كصبه .

مرت ساعات النهار بساع والزغار ايكصصون الكصب وبزرفونه او
وي اول خيط للفضه صاح الدليل بالرحيل . گمدوا الزغار وگلوبهم متروسه
شوك للمواصيل ، السووهه امنس ، واول طفل نفخ ابماصوله . سمع حس

ماصوله ايكول « براس الاسكندر يا بير . . امخضرات الكرون اتنين » .
« ابراس الاسكندر يا بير . . . امخضرات الكرون اتنين »

الوادم البلظن اتنجبوا وگام واحد ينشد الاخر عن قصة المواصيل
وكل واحد منهم راد ايسكت ابنه حتى لا يوصل الخبر الربع الملك ، بس
ماكدروا حتى شاع الخبر بالولاية الوصولهه .

سمع الملك وذاك اليوم صار عليه **كلف** . . كلشي كلف وتمنى يموت
ولا يسمع الخبر بس الخبر شاع . ولن صارت الدينه اغروب ، امر الملك
الخدم ماله ايندونه على وحده من كحيلاته الزينات . وده على الوزير ماله
وگله « آنه اريد اطلع للصيد لوحدي » . . ركه على ظهر كحيلته واطه وجهه
صوب الجزيرة النغره ولليوم محد يدري حي لو مات . وانه خليفته واجبت .

الراوي : عبدالله عيسى الجويراوي

العمر : ٦٥ سنة

المنطقة : الدييسان - العمارة

نسم الجامع : جبار عبدالله الجويراوي

منطقة الجمع : الماجدية - العمارة

تاريخ الجمع : ۱۹۶۷

التراث الشعبي
عيد (١٠) عام ١٤٧٥
١٣٧-١٣٨